



UNIVERSITÄTS-
BIBLIOTHEK
PADERBORN

Universitätsbibliothek Paderborn

Außlegung der Episteln vnd Euangelien: von Ostern bis auff das Aduent

Luther, Martin

Wittemberg, 1547

VD16 L 5614

2 Erinnerung der tieffen Blindheit vnd unzelicher Abgötterey/ ehe wir die
Erkenntnis Christi vnd seine gaben empfangen haben.

urn:nbn:de:hbz:466:1-37032

ben/ vnd die Schrifft auslegen/ besser denn andere (Da sie ein wenig von vns gelernet hatten) vnd furgaben/ Es were wol etwas/ das vnser Euangelium hette angefangen/ vnd die lere ein wenig geleutert/ Aber es were noch nicht genug/ man müste das drein greiffen/ vnd viel höher komen etc. So sie doch mit jrer lere je nicht können einen andern grund setzen Wie S. Paulus 1. Corinth. 3. sagt) noch einen andern Christum leren/ weder das Euangelium lernet/ Sondern eben damit/ weil sie furgeben/ etwas höhers vnd bessers zu leren/ die rechte lere hindern vnd wider verkeren/ das es nicht kan heiffen/ fort gebawet/ sondern mehr den grund auffgehaben vnd zufforet/ vñ die Leute wider in irthumb vnd blindheit gefüret. Darumb sehet nu S. Paulus diese vermanung also an.

Ir wißet/ das jr Heiden gewesen seid/ vnd hingegangen zu den stummen Gözen/ wie jr gefüret wurdet.

Emit helt er jnen fur / was sie zuvor gewesen sind/ ehe sie Christen sind worden/ auff das sie zu rück denken/ vnd sich erinnern/ das sie solche gaben vnd was sie nu haben / nicht von jnen selbst/ noch vmb jre würdigkeit vnd verdienst empfangen/ Das mit sie nicht stolz werden/ noch darob zanken vnd sich trennen/ oder surgeben/ etwas anders oder bessers zu lernen vnd an zu richten in der Kirchen/ Gibe damit auch den andern eine schlappen/ die sich daran ergern wolten/ das die Christen vnternander selbst vneins wurden.

Lieber / dencket doch alle gleich zu rück (wil er sagen) Was seid jr gewesen/ ehe jr zu Christo komen? Eitel blindheiden/ die jr kein erkentnis Gottes hattet/ sondern lieffet euch bey den nasen führen/ wo man euch nur von einem Gotte saget/ Vnd war alle ewer wesen nichts anders / denn eitel zutrenneter Gottes dienst/ da ein jeder/ wo er sich hinwendet/ da muste er einen eigen Gözen haben/ auch das Kind in der wiesgen/ so es der Mutter milch sang/ Wie S. Augustinus zelet/ das allein die Stad Rom mehr denn vier hundert

Götter gehabt/ Dazu eine Kirche gebawet/ die noch stehet/ vor zeiten Pantheon genant/ aller Götter in der Welt.

Da seid jr mit hauffen hingelauffen/ wie man euch nur füret/ daselbs gebetet/ geopffert/ vnd ewer hertz gehenget an eitel stumme Gözen/ die euch weder leren/ raten/ trösten/ geben noch helffen kunden/ vnd nichts dauon hattet/ weder das jr ein blind/ elend/ jemerlich zutrennet Volck waret/ vnd kundet euch keines irthumbes erwehren/ lieffet euch von jederman zureissen/ wie ein armer hauff zurstreweter Schafe von den Wölfen.

Tu aber seid jr aus solcher vielfeltiger Abgötterey zu einem einigen rechten Gottes dienst gebracht/ durch Gottes Wort erleuchtet/ dazu euch in Christo solche herrliche grosse gaben/ verstand der Schrifft/ mancherley sprache/ vnd wunderthaten gegeben / welcher die Welt keine nicht hat / noch zu wegen bringen kan/ Das man sehen vnd greiffen mus/ das jr habe den rechten warhaftigen Gott/ der da nicht/ wie die stummen Gözen/ euch leste on Wort in der jre gehen/ nach ewern eigen gedanken/ sondern als ein lebendiger Gott/ mit euch redet/ das jr wißet / was jr euch zu jm versehen sollet/ vnd bey euch wircket/ auch öffentlich vnd sichtbarlich.

Darumb solt jr nicht wider / nach heidnischer weise vnter euch trennung machen/ wie jr sehet in der groffen Babylon/ verwirrung vnd zutrennung der Welt/ da es keiner mit dem andern helt/ einer zu diesem/ der ander zu jenem Gözen leufft/ vnd wil ein iglicher der best sein/ Sondern weil jr wißet/ das jr alle einen warhaftigen Gott/ vnd Gottes Wort habt/ solt jr euch auch also zusammen halten/ in einerley Glauben vnd sinn / vnd nicht vnter euch selbst trennen lassen / als hertzt jr mancherley Gott/ Glauben/ Tauffe/ Geist vnd seligkeit.

Er redet sonderlich nahe/ beide/ den Klüglingen vnd naseweisen Splitter Richtern der Christen/ vnd auch den andern Kottischen Köpfen (so er sagt/ Ir gienget nach den stummen Gözen/ wie jr gefüret wurdet) welche flugs daher urteilen/

Pantheon zu Rom/ ist Maria runda.

Stumme Gözen dienst.

Mancherley zutrennung der Abgötterey.

Klüglinge vnd Kotten Geister haben selbst keine gewisse einrechtige lere.

Item ge...

Blindheit vnd Abgötterey der Welt/ wo Christus nicht erkand wird.